

四庫全書

史部

欽定四庫全書

史部

通志卷一百七十

詳校官編修_臣李潢

編修_臣裴謙覆勘

覆校官助教_臣金學詩

校對官主事_臣張培

謄錄舉人_臣吳壽朋

欽定四庫全書

通志卷一百七十

宋右迪功郎鄭樵漁仲撰

循吏傳第一

晉

魯芝 胡威 杜軫 竇允 王宏 曹攄 潘

京 范畧 子紹 喬智明 鄧攸 吳隱之

宋

吉翰

杜驥

兄坦

申恬

族兄坦

杜慧度

父瓊文

檀和之

阮

長之

子師門

甄法崇

孫彬

南齊

傅琰

王沈周洽

沈瓚之琰子翹

虞愿

王洪軌

李珪之

梁

沈瑀

范述曾

邱師施

孫謙

從子廉

何遠

郭祖深

後魏

張恂

孫萇年

張膺

宋世景

路邕

閻慶允

明

亮 杜纂 裴佗 竇瑗 羊敦 蘓淑

北齊

張華原 宋世良 郎基 孟業 崔伯謙 蘓

瓊 房豹 路去病

隋

梁彥光 子文謙 樊叔略 趙軌 房恭懿 公孫

景茂 辛公義 柳儉 郭絢 劉曠 王伽 魏德

深

晉

魯芝字世英扶風郿人也世有名德為西州豪族父為
郭汜所害芝襁褓流離年十七乃移居雍耽思墳籍郡
舉上計吏州辟別駕魏車騎將軍郭淮為雍州刺史深
敬重之舉孝廉除郎中會蜀相諸葛亮侵隴右淮復請
芝為別駕事平薦於公府辟大司馬曹真掾轉臨淄侯
文學鄭袤薦於司空王朗朗即加禮命後拜騎都尉叅
軍事行安南太守遷尚書郎曹真出督關右又叅大司

馬軍事真薨宣帝代焉乃引芝叅驃騎軍事轉天水太守郡鄰於蜀數被侵掠戶口減削盜賊充斥芝傾心鎮衛更造城市數年間舊境悉復遷廣平太守天水夷夏慕德老幼赴闕獻書乞留芝魏明帝許焉仍策書加歎勉以黃霸之美加討寇將軍曹爽輔政引為司馬及宣帝起兵誅爽芝率餘衆犯門斬關馳出赴爽勸爽曰公居伊周之位一旦以罪見黜雖欲牽黃犬復可得乎若挾天子保許昌仗天威以羽檄徵天下兵孰敢不從捨

此而去欲就東市豈不痛哉爽慙惑不能用遂委身受
戮芝坐爽下獄當死而口不訟直志不苟免宣帝嘉之
赦而不誅俄而起為使持節領護匈奴中郎將振威將
軍并州刺史以綏輯有方遷大鴻臚高貴鄉公即位賜
爵關內侯邑二百戶母邱儉平隨例增二百戶拜揚武
將軍荊州刺史諸葛誕以壽春叛文帝奉魏帝出征徵
兵四方芝率荊州文武以為先驅誕平進爵武進亭侯
增邑九百戶遷大尚書掌刑理常道鄉公即位進爵豫

城縣侯又增邑八百戶遷監青州諸軍事振武將軍青州刺史轉平東將軍五等建封陰平伯武帝踐阼轉鎮東將軍進爵為侯帝以芝清忠履正素無居宅使軍兵為作屋五十間芝以年及懸車告老遜位章表十餘上於是徵為光祿大夫位特進給吏卒門施行馬羊祜為車騎將軍上表以位讓芝詔不許芝泰始九年卒年八十四帝為舉哀贈贈有加謚曰貞賜塋田百畝

胡威字伯虎一名貌淮南壽春人也父質以忠清著稱

少與鄉人蔣濟朱績俱知名於江淮間仕魏至征東將軍荊州刺史威早厲志尚質之為荊州也威自京都定省家貧無車馬僮僕自驅驢單行每至客舍躬放驢取樵炊爨食畢後隨侶進道既至見父停廐中十餘日告歸父賜絹一疋為裝威曰大人清高不審於何得此絹質曰吾俸祿之餘以為汝糧耳威受之辭歸質帳下都督先威未發請假還家陰資裝於百餘里要威為伴每事佐助行數百里威疑而誘問之既知乃取所賜絹與

都督謝而遣之後因他信以白質質杖都督一百除吏
名其父子清慎如此於是名譽著聞拜侍御史歷南鄉
侯安豐太守遷徐州刺史勤於政術風化大行後入朝
武帝語及平生因歎其父清謂威曰卿孰與父清對曰
臣不如也帝曰卿父以何為勝邪對曰臣父清恐人知
臣清恐人不知是臣不及遠也帝以威言直而婉謙而
順累遷監豫州諸軍事右將軍豫州刺史入為尚書加
奉車都尉威嘗議時政之寬帝曰尚書郎以下吾無所

假借威曰臣之所陳豈在丞郎令史正謂如臣等輩始
可以肅化明法耳拜前將軍監青州諸軍事青州刺史
以功封平春侯太康元年卒於位追贈使持節都督青
州諸軍事鎮東將軍餘如故謚曰烈子奕嗣奕字次孫
仕至平東將軍威弟熊字季象亦有幹用仕至益州刺
史安東將軍

杜軫字超宗蜀郡成都人也父雄縣竹令軫師事譙周
博涉經書州辟不就為郡功曹吏時鄧艾至成都軫白

太守曰今大軍來征必除舊布新明府宜避之此全福之道也太守乃出艾果遣其叅軍牽弘自之郡弘問軫前守所在軫正色對曰前守達去就之機輒出自官舍以俟君子弘器之命復為功曹軫固辭察孝廉除建寧令導以德政風化大行夷夏悅服秩滿將歸羣蠻追送賂遺甚多軫一無所受去如初至又除池陽令為雍州十一郡最百姓生為立祠得罪者無怨言累遷尚書郎博聞廣涉奏議駁論多見施用時涪人李驤亦為尚書

郎與軫齊名每有議論朝廷莫能踰之號蜀有二郎軫
後拜掾為太守甚有聲譽當遷會病卒年五十一子毗
毗字長基州舉秀才成都王穎辟大將軍掾遷尚書郎
參太傅軍事及洛陽覆沒毗南渡江王敦表為益州刺
史將與宜都太守柳純共固白帝杜弢遣軍要毗遂遇
害毗弟秀字彥穎為羅尚主簿州沒為氐賊李驤所得
欲用為司馬秀不受見害毗次子歆舉秀才軫弟烈明
政事察孝廉歷平康安陽令所居有異績遷衡陽太守

聞軫亡因自表兄子弟弱求去官詔轉犍為太守蜀土
榮之後遷湘東太守為成都王穎郎中令病卒烈弟良
舉秀才除新都令涪陵太守不就補州大中正卒

竇允字雅始平人也出自寒門清尚自修少自縣稍遷
郡主簿察孝廉除浩亶長勤於為政勸課田蠶平均調
役百姓賴之遷謂者泰始中詔書旌其清白拜臨水令
克已勵俗改修政事士庶悅服咸歌詠之遷鉅鹿太守
甚有政績卒於官

王宏字正宗高平人魏侍中粲之後孫也魏時辟公府累遷尚書郎歷給事中泰始初為汲郡太守撫百姓如家耕桑樹藝屋宇阡陌莫不躬自教示曲盡事宜在郡有殊績司隸校尉石鑒上其政術武帝下詔褒揚布告天下賜宏穀千斛俄遷衛尉河南尹大司農無復能名更為苛碎坐桎梏罪人以泥墨塗面置深坑中餓不與食又擅縱五歲刑以下二十一人為有司所劾帝以宏累有政績聽以贖論太康中代劉毅為司隸校尉於是

檢察士庶使車服異制庶人不得衣紫絳及綺繡錦繡
帝常遣左右微行觀察風俗宏緣此復遣吏科檢婦人
相服至褻黻於路論者以為暮年謬妄由是獲譏於世
復坐免官後起為尚書太康五年卒追贈太常

曹攄字顏遠譙國譙人也祖肇魏衛將軍攄少有孝行
好學善屬文太尉王衍見而器之調補臨淄令縣有寡
婦養姑甚謹姑以其年少勸令改適婦守節不移姑慙
之密自殺親黨告婦殺姑官為考鞠寡婦不勝苦楚乃

自誣獄當決適值攄到攄知其有冤更加辨究具得情實時稱其明獄有死囚歲夕攄行獄愍之曰卿等不幸致此非所如何新歲人情所重豈不欲暫見家邪衆囚皆涕泣曰若得暫歸死無憾也攄即開獄出之尅日令還掾吏固爭咸謂不可攄曰此雖小人義不見負我自為諸君任之至日相率而還並無違者一縣歎服號曰聖君入為尚書郎轉洛陽令仁惠明斷百姓懷之時天大雨雪宮門夜失行馬羣官檢察莫知所在攄使收門

士衆官咸謂不然。攄曰：「宮掖禁嚴，非外人所敢盜。必是門士以燎寒耳。」詰之，果服。以病去官，復為洛陽令。及齊王問輔政，攄與左思俱為記室督。嘗勸問還政歸藩，問不納。尋轉中書侍郎。長沙王乂以為驃騎司馬，乂敗，免官。因丁母憂，惠帝末起為襄城太守。時襄城屢經寇難，攄綏懷振理，旬月克復。永嘉二年，高密王簡鎮襄陽，以攄為征南司馬。其年，流人王廋等聚衆屯冠軍，寇略城邑，簡遣參軍崔曠討之。令攄督護曠，奸凶人也，誚攄前。

戰期為後繼既而不至據獨與追戰於酈縣軍敗死之
故吏及百姓並奔喪會葬號哭即路如赴父母焉

潘京字世長武陵漢壽人也弱冠郡辟主簿太守趙廞
甚器之嘗問曰貴郡何以名武陵京曰鄙郡本名義陵
在辰陽縣界與夷相接數為所攻光武時移東出遂得
全完共議易號傳曰止戈為武詩稱高平曰陵於是名
焉為州所辟因謁見問策探得不孝字刺史戲京曰辟
士為不孝邪京舉版答曰今為忠臣不得復為孝子其

機辯皆此類後太廟立州郡皆遣使賀京白太守曰夫太廟立移神主應問訊不宜賀遂遣京作文使詣京師以為永式京仍舉秀才到洛陽尚書令樂廣京州人也共談累日深歎其才因謂京曰君天才過人恨不學耳若學必為一代談宗京感其言遂勤學不倦時武陵太守戴昌亦善談論與京共談京假借之昌以為不如已笑而遣之令過其子若思京方極其言論昌竊聽之乃歎服曰才不可假遂父子俱屈焉歷巴邱邵陵泉陵三

令京明於政術路不拾遺遷桂陽太守不就歸家年五十卒

范晷字彥長南陽順陽人也少游學清河遂徙家僑居郡命為五官掾歷河內郡丞太守裴楷雅知之薦為侍御史調補上谷太守遭喪不之官後為司徒左長史轉馮翊太守甚有政能善於綏撫百姓愛悅之徵拜少府出為涼州刺史轉雍州於時西土荒毀氏羌蹈藉田桑失收百姓困弊晷傾心化導勸以農桑所部甚賴之元

康中加左將軍卒於官二子廣稚廣字仲將舉孝廉除
靈壽令不之官姊適孫氏早亡有孫名邁廣負以南奔
雖盜賊艱急終不棄之元帝承制以為堂邑令丞劉榮
坐事當死郡劾以付縣榮即縣人家有老母至節廣輒
聽暫還榮亦如期而反縣堂為野火所及榮脫械救火
事畢還自著械後大旱米貴廣散私穀振饑人至數千
斛遠近流寓歸投之戶口十倍卒於官稚少知名辟大
將軍掾早卒子汪別有傳

丁紹字叔倫譙國人也少開朗公正早歷清官為廣平太守政平訟理道化大行於時河北騷擾靡有完邑而廣平一郡四境乂安是以皆悅其法而從其令及臨漳被圍南陽王模窘急紹率郡兵赴之模賴以獲全模感紹恩生為立碑遷徐州刺史士庶攀戀慕附如歸未之官復轉荊州刺史從車千乘南渡河至許時南陽王模為都督留紹啓轉為冀州刺史到鎮率州兵討破汲桑有功加寧北將軍假節監冀州諸軍事時境內羯賊為

患紹招而誅之號為嚴肅河北人畏而愛之紹自以為才足為物雄當官蒞政每事克舉視天下之事若運於掌握遂慨然有董正四海之志矣是時王浚盛於幽州荀晞盛於青州然紹視二人蔑如也永嘉三年暴病而卒臨終歎曰此乃天亡冀州豈吾命哉懷帝策贈車騎將軍

喬智明字元達鮮卑前部人也少喪二親哀毀過禮長而以德行著稱成都王穎辟為輔國將軍穎之敗趙王

倫也表智明為殄寇將軍隆慮共二縣令二縣愛之號為神君部人張允為父報仇母老單身有妻無子智明愍之停其獄歲餘令允將妻入獄無陰縱之人有勸允逃者允曰有君如此吾何忍累之縱吾得免作何面目視息世間於獄產一男會赦得免其仁感如是惠帝之伐鄴也穎以智明為折衝將軍叅丞相前鋒軍事智明勸穎奉迎乘輿穎大怒曰卿名曉事投身事孤主上為羣小所逼將加非罪於孤卿奈何欲使孤束手就刑邪

共事之義正若此乎智明乃止尋屬永嘉之亂仕於劉曜

鄧攸字伯道平陽襄陵人也祖殷亮直彊正鍾會伐蜀奇其才自澠池令召為主簿賈充伐吳請殷為長史後授皇太子詩為淮南太守夢行水邊見一女子猛獸自後斷其盤囊占者以為水邊有女汝字也斷盤囊者新獸頭代故獸頭也不作汝陰當作汝南也果遷汝陰太守後為中庶子攸七歲喪父尋喪母及祖母居喪九年

以孝致稱清和平簡貞正寡欲少孤與弟同居初祖父殷有賜官勅攸受之後太守勸攸去王官欲舉為孝廉攸曰先人所賜不可改也嘗詣鎮軍賈混混以人訟事示攸使決之攸不視曰孔子稱聽訟吾猶人也必也使無訟乎混竒之以女妻焉舉灼然二品為吳王文學歷太子洗馬東海王越叅軍越欽其為人轉為世子文學吏部郎越弟騰為東中郎將請攸為長史出為河東太守永嘉末沒於石勒然勒宿忌諸官長二千石聞攸在

營馳召將殺之攸至門門幹乃攸為郎時幹識攸攸求
紙筆作辭幹候勒和悅致之勒重其辭乃命勿殺勒長
史張賓先與攸比舍重攸名操因稱攸於勒勒召幕下
與語悅之以為參軍給車馬勒每東西置攸車營中勒
夜禁火犯之者死攸與胡鄰轂胡夜失火燒車吏按問
胡乃誣攸攸度不可與爭遂對以弟婦散發溫酒為辭
勒赦之既而胡人深感自縛詣勒以明攸而陰遺攸馬
驢諸胡莫不歎息宗敬之石勒過泗水攸乃斫壞車以

牛馬負妻子而逃又遇賊掠其車馬步走擔其兒及其弟子綏度不能兩全乃謂其妻曰吾弟早亡惟有一息理不可絕止應自棄我兒耳幸而得存我後當有子妻泣而從之乃棄之其子朝棄而暮及明日攸繫之於樹而去至新鄭投李矩三年將去而矩不聽荀組以為陳郡汝南太守愍帝徵為尚書左丞長水校尉皆不果就後密捨矩去投荀組於許昌矩深恨焉久之乃送家屬還攸攸與刁協周顗素厚遂至江東元帝以攸為太子

中庶子時吳郡闕守人多欲之帝以授攸攸載米之郡俸祿無所受惟飲吳水而已時郡中大饑攸表賑貸未報乃輒開倉救之臺遣散騎常侍桓彝虞駿慰勞饑人觀聽善不乃劾攸以擅出穀俄而有詔原之攸在郡刑政清明百姓歎悅為中興良守後稱疾去職郡常有送迎錢數百萬攸去郡不受一錢百姓數千人留亭攸船不得進攸乃小停夜中發去吳人歌之曰統如打五鼓雞鳴天欲曙鄧侯拖不留謝令推不去百姓詣臺乞留

一歲不聽拜侍中歲餘轉吏部尚書疏食弊衣周急賑
乏性謙和善與人交賓無貴賤待之若一而頗敬媚權
重永昌中代周顗為護軍將軍太寧二年王敦反明帝
密謀起兵乃遷攸為會稽太守初王敦伐都之後中外
兵數每月言之於敦攸已出在家不復知護軍事有惡
攸者誣攸尚白敦兵數帝聞而未之信轉攸為太守時
帝南郊攸病不能從車駕過攸問疾攸力病出拜有司
奏攸不堪行郊而拜道左坐免攸每有進退無喜愠之

色久之遷尚書左僕射咸和元年卒贈光祿大夫加金
章紫綬祠以少牢攸棄子之後妻不復孕過江納妾甚
寵之訊其家屬說是北人遭亂憶父母姓名乃攸之甥
攸素有德行聞之感恨遂不復畜妾卒以無嗣時人義
而哀之為之語曰天道無知使鄧伯道無兒子綏服
攸喪三年

吳隱之字處默濮陽鄆城人魏侍中質六世孫也隱之
美姿容善談論博涉文史以儒雅標名弱冠而介立有

清操雖曰晏歡叔不享非其粟儋石無儲不取非其道
年十餘丁父憂每號泣行人為之流涕事母孝謹及其
執喪哀毀過禮家貧無人鳴鼓每至臨哭之時常有雙
鶴警叫及祥練之夕復有羣鴈俱集時人咸以為孝感
所致嘗食鹹菹以其味甘掇而棄之與太常韓康伯隣
居康伯母殷浩之姊賢明婦人也每聞隱之哭聲輟飧
投筯為之悲泣既而謂康伯曰汝若居銓衡當舉如此
輩人及康伯為吏部尚書隱之遂階清級解褐輔國功

曹轉參征虜軍事兄坦之為袁真功曹真敗將及禍隱
之詒桓溫乞代兄命溫矜而釋之遂為溫所知賞拜奉
朝請尚書郎累遷晉陵太守在郡清儉妻自負薪入為
中書侍郎國子博士太子右衛率轉散騎常侍領著作
郎孝武欲用為黃門郎以隱之貌類簡文帝乃止尋守
廷尉祕書監御史中丞領著作如故遷左衛將軍雖居
清顯祿賜皆頒親族冬月無被嘗澣衣乃披絮勤苦同
於貧庶廣州包帶山海珍異所出一篋之寶可資數世

然多瘴疫人情憚焉惟貧窶不能自立者求補長史故前後刺史皆多黷貨朝廷欲革嶺南之弊以隱之為龍驤將軍廣州刺史假節領平越中郎將未至州二十里地名石門有水曰貪泉飲之者懷無厭之欲隱之既至語其親曰不見可欲使心不亂越嶺喪清吾知之矣乃至泉所酌而飲之因賦詩曰古人云此水一飲懷千金試使夷齊飲終當不易心及在州清操逾勵常食不過菜及乾魚而已帷帳器服皆付外庫時人頗謂其矯然

亦始終不易帳下人進魚每剔去骨存肉隱之覺其用意罰而黜焉元興初詔嘉美之進號前將軍賜錢五千萬穀千斛及盧循寇南海隱之率厲將士固守彌時長子曠之戰沒循攻擊百有餘日踰城放火焚燒三千餘家死者萬餘人城遂陷隱之携家累出欲奔還都為循所得循表朝廷以隱之黨附桓溫宜加裁戮詔不許劉裕與循書令遣隱之還久方得反歸舟之日裝無餘資及至數畝小宅籬垣仄陋内外茅屋六間不容妻子劉

裕賜車牛更為起宅固辭尋拜度支尚書太常以竹蓬為屏風坐無氍毹席後選中領軍清儉不草每月初得祿裁留身糧其餘悉分賑親族人紡績以供朝夕時有困絕或并日而食身常布衣不完妻子不需寸祿義熙八年請老致事優詔許之授光祿大夫加金章紫綬賜錢十萬米三百斛九年卒追贈左光祿大夫加散騎常侍隱之清操不渝屢被褒飾致事及於身沒常蒙優錫顯贈廉士以為榮初隱之為奉朝請謝石請為衛將軍

主簿隱之將嫁女石知其貧素遣女必當率薄乃令移
厨帳助其經營使者至方見婢牽犬出賣之此外蕭然
無辦後至自番禺其妻劉氏齋沉香一斤隱之見之遂
投於湖亭之水子延之復勵清操為都陽太守延之弟
及子為郡縣者常以廉慎為門法雖才學不逮隱之而
孝悌潔敬猶為不替

宋

吉翰字休文馮翊池陽人也初為龍驤將軍劉道憐參

軍隨府轉征虜左軍參軍隨道憐北征廣固賜爵建城
縣五等侯參武帝中軍軍事臨淮太守復為道憐驃騎
中兵參軍從事中郎為將佐十餘年清謹勤正甚為武
帝所知賞元嘉中歷位梁南秦二州刺史徙益州刺史
加督在任著美績甚得方伯之體論者稱之累遷徐州
刺史監徐兗二州豫州梁郡諸軍事時有死罪囚典籤
意欲活之因翰入關齋呈其事翰省訖語令且去明可
更呈明旦典籤不敢復入呼之乃來取昨所呈事視訖

謂曰卿意欲宥此囚死命昨於齋坐見其事亦有心活之但此囚罪重不可全貸既欲加恩卿當代任其罪因命左右收典籤付獄殺之原此囚生命其刑政類如此自下畏服莫敢犯禁卒於官

杜驥字度世京兆杜陵人也高祖預晉征南將軍曾祖耽避難河西因仕張氏苻堅平涼州父祖始還關中兄坦頗涉史傳武帝平長安席卷隨從南還元嘉中文帝任遇坦甚厚歷後軍將軍青冀二州刺史坦晚歲入南

朝廷常以儉荒遇之雖復人才可施每為清途所隔坦
常以此慨然嘗與文帝言及史籍上曰金日磾忠孝淳
深漢朝莫及恨今世無復此輩人坦曰日磾忠義誠如
聖詔假使出於今世養馬不暇豈辯見知上變色曰卿
何量朝廷之薄也坦曰請以臣言之臣本中華高族亡
高祖因晉氏喪亂播遷涼土世業相承不殞其舊直以
南度不早便以荒儉賜隔日磾胡人身為牧圉便超入
內侍齒列名賢聖朝雖復拔才臣恐未必能也上默然

北土舊法問疾必遣子弟驥年十三父使候同郡韋華
華子元有高名見而異之以女妻焉桂陽公義真鎮長
安辟為主簿累遷長沙王義欣後軍錄事參軍元嘉七
年隨到彥之入洛加建武將軍魏撤河南戍悉歸河北
彥之使驥守洛陽洛陽城不治既久又無糧食及彥之
敗退驥欲棄城走慮為文帝所誅初武帝平關洛致鍾
虞舊器南還一大鍾墜洛水中至是歲文帝遣將姚聳
夫領千五百人迎致之時聳夫政率所領牽鍾於洛水

驥乃遣使給之曰虜旣北度洛城勢弱今修理城池並已堅固軍糧又足所乏者人耳君率衆見就共守此城大功旣立取鍾無晚聳夫信之率所領就驥及至知城不可守又無糧食於是引衆去驥亦委城南奔白文帝本欲以死固守緣聳夫入城便走人情沮敗不可復禁上怒使建威將軍鄭順之殺聳夫於壽陽聳夫吳興武康人勇果有氣力宋偏裨小將莫及乃以驥為通直郎十七年出為青冀二州刺史在任八年惠化著於齊土

自義熙至於宋末刺史惟羊穆之及驥為吏民所稱詠
後徵為左軍將軍兄坦代為刺史北土以為榮焉坦長
子琬為員外散騎侍郎文帝常有旨詔勅坦琬輒開視
信未及發又追取之勅旨已發大相推檢上遣主書詰
責驥并檢開旨之主驥答曰開旨是臣第四息季文伏
待刑坐上特原不問卒官驥第五子幼文薄於行明帝
初以軍功封邵陽縣男尋坐巧妄奪爵後以發太尉廬
江王禧謀反事拜給事黃門侍郎廢帝元徽中為散騎

常侍幼文所泣貪殘家累千金與沈勃孫超之居止接近又並與阮佃夫厚善佃夫既死廢帝深疾之帝微行夜輒在幼文門墉間聽其弦管積久轉不能平於是自率宿衛兵誅幼文勃超之等兄叔文為長水校尉亦誅申恬字公休魏郡魏人也曾祖鍾為石虎司徒武帝平廣固恬父宣宣從父兄子坦皆得歸晉並以幹用見知武帝踐阼拜太中大夫宣元嘉初歷充青二州刺史恬兄謨與朱脩之守滑臺魏克滑臺見虜後得還為竟陵

太守恬初為驃騎劉道憐長史兼行參軍宋受命辟東
宮殿中將軍度還臺直省十年不請休息歷下邳北海
二郡太守所至皆有政績又為北譙梁二郡太守郡境
邊接任榛屢被寇抄恬到任密知賊來乃伏兵要害出
其不意悉皆禽殄元嘉十二年遷督魯東平濟北三郡
諸軍事太山太守咸惠無著吏民便之二十一年冀州
移鎮歷下以恬為冀州刺史加督明年加濟南太守孝
武踐阼為青州刺史尋加督齊地連歲興兵百姓彫弊

恬防禦邊境勸課農桑二三年間遂皆優實性清約頻
處州郡妻子不免饑寒世以此稱之後拜豫州刺史以
疾徵還道卒死之日家無遺財子寔南譙太守謨子元
嗣海陵太守元嗣弟謙臨川內史坦以孝建初為太子
右衛率徐州刺史大明元年魏攻兗州孝武遣太子左
衛率薛安都東陽太守沈法系北捍至兗州魏軍已去
坦建議任榛亡命屢犯邊人今軍出無功宜因此翦撲
上從之亡命先已聞知舉村逃走安都法系坐白衣領

職坦棄市羣臣為請莫得將行刑始興公沈慶之入市
抱坦慟哭曰卿無罪為朝廷所枉誅我入市亦當不久
市官以白上乃原其生命繫尚方尋被宥復為驍騎將
軍疾卒子令孫明帝時為徐州刺史討薛安都行至淮
陽即與安都合弟闡時為濟陰太守戍睢陵城奉順不
同安都安都攻圍不能克會令孫至遣往睢陵說闡闡
降殺之令孫亦見殺

杜慧度交趾朱戴人也本屬京兆曾祖元為寧浦太守

遂居交趾父瑗字道言仕州府為日南九德交趾太守
初九真太守李遜父子勇壯有權力威制交土聞刺史
滕遜之當至分遣二子斷遏水陸要津瑗收衆斬遜州
境獲寧後林邑王范達陷日南九真遂寇交趾瑗討破
之授龍驤將軍交州刺史武帝義旗建進號冠軍將軍
盧循竊據廣州遣使通好瑗斬之義熙六年卒年八十
四贈右將軍慧度瑗第五子也初為州主簿流民都護
遷九真太守瑗卒郡州綱佐以交州土接蠻境不宜曠

職共推慧度行州府事辭不就七年除交州刺史詔書未到其年春盧循襲破合浦徑向交州慧度乃率文武六千人距循於石崎破之循雖破餘黨皆習兵事李遜子孫李奕李移李脫等皆奔竄石崎盟結狸獠各有部曲循知奕等與杜氏有怨遣使招之奕等受循節度六月庚子循晨造南津令三軍入城乃食慧度悉出宗族私財以充勸賞自登高艦合戰放火箭燒循船循衆艦俱然一時潰散循中箭赴水死遂斬循及父嘏并循二

子並傳首京師以功封龍編縣侯武帝踐阼進號輔國將軍其年率文武萬人南討林邑所殺過半其前後抄略者悉得還林邑乞降輸生口大象金銀古貝等乃釋之遣長史江攸奉表獻捷慧度布衣蔬食儉約質素能彈琴頗好莊老禁斷淫祀崇修學校歲荒民饑則以私祿賑給為政纖密有如治家由是威惠沾洽奸盜不起乃至城門不夜閉道不拾遺卒追贈左將軍以慧度長子弘文為振遠將軍交州刺史初武帝北征關洛慧度

版弘文行九真太守至是繼父為刺史亦以寬和得衆
龔爵龍編侯元嘉四年文帝以廷尉王徽為交州刺史
弘文被徵會得重疾寧以就路親舊見其患篤勸待病
愈弘文曰吾世荷皇恩仗節三世常欲投軀帝廷以報
所荷况親被徵命而可晏然者乎弘文母阮年老見弘
文輿疾就路不忍別與到廣州遂卒臨死遣弟弘猷詣
建業朝廷甚哀之孝建中以豫章太守檀和之為豫州
刺史和之先歷始興太守交州刺史所在有威名盜賊

屏迹每出獵猛獸伏不敢起

阮長之字景茂一字善業陳留尉氏人也祖思曠金紫
光祿大夫父普驃騎諮議參軍長之年十五喪父有孝
性每哭哀感路人除服蔬食者猶積載間居耽學未嘗
有惰容初為諸府參軍母老求補襄垣令督郵無禮鞭
之去職後拜武昌太守時王弘為江州雅相知敬引為
車騎從事中郎元嘉九年遷臨川內史以南土卑濕母
年老非所宜辭不就十一年除臨海太守在官常擁敗

絮至郡少時母亡葬畢不勝憂十四年卒時郡縣田祿以芒種為斷此前去官者則一年秩祿皆入後人始以元嘉末改此科計月分祿長之為武昌太守時在元嘉之初及去郡代人未至以芒種前一日解印綬初發京師親故或以器物贈別得便緘錄後歸悉以還人為中書郎直省夜誤着鄰省屐出閤依事自列門下門下以閤夜人不知不受列長之固遣送之曰一生不悔閤室所泣官皆有風政為後人所思宋世言善政者咸稱之

文帝深惜之曰景茂方堪大用豈直以清苦見惜子師門原鄉令元嘉初文帝遣大使巡行四方兼散騎常侍王歆之等上言宣威將軍陳南頓二郡太守李元德清勤均平姦盜止息彭城內史魏恭子廉惜修慎在公忘私安約守儉久而彌固前宋縣令成浦為政寬濟遺詠在人前鮦陽令李熙國在事有方人思其政故山桑令何道自少清廉白首彌勵應加褒賚以勸於後各被褒賜歆之字叔道河東人曾祖愆期有名晉世官至南蠻

校尉歆之位左戶尚書光祿大夫卒官

甄法崇中山人也父匡位少府卿以清聞法崇永初中
為江陵令在任嚴整縣境肅然於時南平繆士通為江
安令卒官至其年末法崇在聽事士通前見法崇知其
已亡愕然未言坐定云卿縣人宋雅見負米千餘石不
還令兒窮弊不自存故自訴法崇因命口受為辭因遜
謝下席而法崇為問宋家狼狽輸送太守王華聞而歎
美之法崇孫彬彬有行業鄉黨稱善嘗以一束苧就州

長沙寺庫質錢後贖亭還於亭東中得五兩金以手巾裏之彬得送還寺庫道人驚云近有人以此金質錢時有事不得舉而失檀越乃能見還輒以金半仰酬往復十餘彬堅然不受因謂曰五月披羊裘而負薪豈拾遺金者邪卒還金梁武帝布衣時聞之及踐阼以西昌侯藻為益州刺史乃以彬為府錄事參軍帶郫縣令將行同列五人帝誠以廉慎至彬獨曰卿昔有還金之美故不以此言相屬由此名德益彰及在蜀禮之甚厚云

南齊

傅琰字季珪壯地靈州人也曾祖弘仁宋武帝之外弟
以中表歷顯官位太常卿祖劭字彥先員外散騎侍郎
父僧祐山陰令有能名琰美姿儀仕宋為武康令遷山
陰令並著能名二縣皆謂之傅聖賜爵新亭侯元徽中
遷尚書左丞母喪鄰家失火延燒琰屋琰抱柩不動鄰
人競來赴救乃得俱全琰股髀之間已被烟焰服闋高
帝輔政以山陰獄訟煩積復以琰為山陰令賣針賣糖

二姥爭團絲來詣琰琰掛團絲於柱令鞭之密視有鐵屑乃罰賣糖者又二野父爭雞琰各問何以食雞一人云粟一人云豆乃破雞得粟罪言豆者縣內稱為神明無敢復為偷盜琰父子並著奇績江左鮮有時云諸傳有治縣譜子孫相傳不以示人昇明中遷益州刺史自縣遷州近世罕有建元四年徵為驍騎將軍黃門侍郎永明中為廬江王安西長史南郡內史行荊州事五年卒琰喪西還有詔出臨哭時長沙太守王沈新蔡太守

劉聞慰晉平太守邱仲起長沙縣令何敬叔故鄆縣令
邱寂之皆有能名而不及琰也沈字彥流東海人歷錢
唐山陰秣陵令南平長沙太守清廉戒慎身恒居祿而
居處曰貧死之日無宅可憊故吏為營棺柩聞慰自有
傳仲起見沈憲傳敬叔見子思澄傳寂之字德元吳興
烏程人年十七為州西曹無直主簿刺史王彧行縣夜
還前驅已至而寂之不肯開門曰不奉墨旨彧方於車
中為教然後開彧歎曰不意鄧君章近在閤下即轉為

主簿在縣專以廉潔御下於時丹徒縣令沈瓚之以清
廉抵罪寂之聞之曰清吏真不可為也政當處季孟之
間乎瓚之吳興武康人性疎直在縣自以清廉不事左
右浸潤日至遂鎖繫尚方歎曰一見天子足矣上召問
曰復欲何陳答曰臣坐清所以獲罪上曰清復何以獲
罪曰無以承奉要人上曰要人為誰瓚之以手板四面
指曰此赤衣諸賢皆是若臣得更鳴必令清譽日至瓚
之雖危言上亦不責後知其無罪重除丹徒令入縣界

吏人候之謂曰我今重来當以人肝代米不然清名不立又有汝南周洽歷句容曲阿上虞吳令廉約無私卒於都水使者無以殯斂吏人為買棺器武帝聞而非之曰洽累歷名邑而居處不理遂坐無車宅死令吏衣棺之此故宜罪貶無論褻恤乃勅不給贈賻琰子翽為官亦有能名後為吳令別建康令孫廉廉因問曰聞丈人發姦擿伏惠化如神何以至此答曰無他也惟勤而清清則憲綱自行勤則無事不理憲綱自行則吏不能欺

事自理則物無凝滯欲不理得乎時臨淮劉元明亦有
吏能歷山陰建康令政常為天下第一終於司農卿後
嗣又代元明為山陰令問元明曰願以舊政告新令尹
答曰我有奇術卿家譜所不載臨別當相示既曰作縣
令惟日食一升飯而莫飲酒此第一策也嗣天監中為
建康令復有能名遷驃騎諮議參軍子岐亦稱良吏梁
史有傳

虞愿字士恭會稽餘姚人也祖賚給事中監利侯父望

之早卒賚中庭橘冬熟子孫競來取之愿年數歲獨不
取賚及家人皆異之宋元嘉中為湘東王國常侍後遷
潁陽王府墨曹參軍明帝立以愿儒吏學涉兼藩國舊
恩意遇甚厚除太常丞尚書祠部郎通直散騎常侍帝
性猜忌體肥憎風夏月常著小皮衣拜左右二人為司
風令史風起方面輒先啓聞星文災變不信太史不聽
外奏勅靈臺知星一人給愿常直內省有異先啓以相
糾察帝以故宅起湘宮寺費極奢侈以孝武莊嚴刹七

層帝欲起十層不可立分爲兩刹各五層新安太守巢尚之罷郡還見帝曰卿至湘宮寺未我起此寺是大功德愿在側曰陛下起此寺皆是百姓賣兒貼婦佛若有知當悲哭哀愍罪高佛圖有何功德尚書令袁粲在坐爲之失色帝大怒使人馳曳下殿愿徐去無異容以舊恩後復召入帝好圍碁碁甚拙去格七八道物議共欺爲第三品與第一品王抗圍碁依品賭戲抗每饒借帝曰皇帝飛碁臣抗不能斷帝終不覺以爲信然好之愈

薦愿又曰堯以此教丹朱非人主所宜好也雖數忤旨而蒙賞賜猶異餘人選兼中書侍郎帝寢疾愿常侍醫藥帝素能食尤好魴鯪以銀鉢盛蜜漬之一食數鉢謂揚州刺史王景文曰此是奇味卿頗足不景文曰臣夙好此物家素貧乏致之甚難帝甚悅食魴鯪積多胸腹痞脹氣將絕左右啓飲數升酢酒乃消疾大困一食汁滓猶至三升水患積久藥不復效大漸日正坐呼道人合掌便絕愿以侍疾日久轉正員郎出為晉安太守在

郡不事生業前政與百姓交關質錄其兒婦愿遣人於道奪取將還在郡立學堂教授郡舊出髯蛇膽可為藥有遺愿蛇者愿不忍殺放二十里外山中一夜蛇還牀下復送四十里外山經宿復還故處愿更令遠送乃復歸論者以為仁心所致海邊有越王石常隱雲霧相傳云清廉太守乃得見愿往就觀視清徹無隱蔽後琅邪王秀之為郡與朝士書曰此郡承虞公之後善政猶存遺風易遵差得無事愿以母老解職除後軍將軍褚淵

嘗詣愿愿不在見其眠牀上頗積塵埃有書數帙而已
淵歎曰虞君之清一至於此令人埽地拂牀而去遷中
書郎領東觀祭酒兄季為上虞令卒愿後省步出還家
不得詔便歸東除驍騎將軍遷廷尉祭酒如故愿嘗事
宋明帝齊初神主遷汝陰廟愿拜辭流涕建元元年卒
著五經論問撰會稽記文翰數十篇

王洪軌上谷人也宋大始中魏克青州洪軌得別駕清
河崔祖歡女仍以為妻祖歡女說洪軌南歸宋桂陽王

之難隨高帝鎮新亭常以身捍矢高帝曰我自有楯歸
可自防答曰天下無洪軌何有哉蒼生方亂豈可一日
無公帝甚賞之後為晉壽太守多招贓賄為州所按大
懼棄郡奔建鄴高帝輔政引為腹心建武初為青冀二
州刺史悔為晉壽時貨賕所敗更勵清節先是青州資
魚鹽之貨或彊借百姓麥地以種紅花多與部下交易
以祈利益洪軌至一皆斷之啓求侵魏得黃郭鹽倉等
數戍後遇敗死傷塗地深自咎責乃於謝祿山南除地

廣設茵席殺三牲招戰亡者魂祭之人人呼名躬自沃
盥仍慟哭不自勝因發病而亡洪軌旣壯人而甚清正
州人呼之為厲父使君言之咸落涕焉永明中有江夏
李珪之字孔璋位尚書右丞兼都水使者歷職稱為清
能後兼少府卒

梁

沈瑀字伯瑜吳興武康人也父昶事宋建平王景素景
素謀反昶先去之及敗坐繫獄瑀詣臺陳請得免罪由

是知名為奉朝請嘗詣齊尚書左丞殷湏湏與語及政事甚器之謂曰觀卿才幹當居吾此職司徒竟陵王子良聞瑀名引為府行參軍領揚州部傳從事時建康令沈徽孚恃勢傲瑀瑀以法繩之衆憚其彊子良甚相知賞雖家事皆以委瑀子良薨瑀復事刺史始安王遙光嘗使送人丁速而無怨遙光謂同使吏曰爾何不學沈瑀所為乃令瑀專知州獄事湖熟縣方山埭高峻冬月公私行侶以為艱明帝使瑀行修之瑀乃開四洪斷行

客就作三日便辦揚州書佐私行詐稱州使不肯就作
瑤鞭之四十書佐歸訴遙光遙光曰沈瑤必不枉鞭汝
覆之果有詐明帝復使瑤築赤山塘所費減材官所量
數十萬帝益善之為建德令教民一丁種十五株桑四
株柿及梨栗女子丁半之民咸歡悅頃之成林去官還
都兼行選曹郎隨陳伯之軍至江州會武帝起兵圍郢
城瑤說伯之迎武帝伯之泣曰余子在都不得出城不
能不憂之瑤曰不然人情凶凶皆思改計若不早圖衆

散難合伯之遂以衆降瑀從在武帝軍中初瑀在竟陵王家素與范雲善齊末嘗就雲宿夢坐屋梁柱上仰見天中有字曰范氏宅至是瑀為帝說之帝曰雲得不死此夢可驗及帝即位雲深薦瑀自既陽令擢兼尚書右丞時天下初定陳伯之言瑀催督運輸軍國護濟帝以為能遷尚書駕部郎兼右丞如故瑀薦族人沈僧隆僧照有吏幹帝並納之以母憂去職起為餘姚令縣大姓虞氏千餘家請謁如市前後令長莫能絕自瑀到非訟

訴無所通以法繩之縣南又有豪族數百家子弟縱橫
遞相庇蔭厚自封植百姓甚患之瑀召其老者為石頭
倉監少者補縣僮皆號泣道路自是權右屏跡瑀初至
富吏皆鮮衣美服以自彰別瑀怒曰汝等下縣吏何得
自擬貴人悉使著芒屨麤布侍立終日足有蹉跌輒加
榜箠瑀微時嘗至此鬻瓦器為富人所辱故因以報焉
由是士庶駭怨瑀廉潔自守故得遂行其意後為安南
長史尋陽太守江州刺史曹景宗卒仍為信威蕭穎達

長史太守如故瑀性屈彊每忤穎達穎達銜之天監八年因入諮事辭又激厲穎達作色曰朝廷用君作行事邪瑀出謂人曰我死而後已終不傾側面從是日於路為人所殺多以為穎達害焉子續累訟之遇穎達尋卒事不窮竟續乃布衣蔬食終其身

范述曾字子元一字穎彥吳郡錢唐人也幼好學從餘杭呂道惠受五經略通章句道惠曰此子必為王者師齊文惠太子竟陵文宣王幼時齊高帝引述曾為之師

友起家宋晉熙王國侍郎齊初至南郡王國郎中令遷
太子步兵校尉帶開陽令述曾為人謇諤在官多所諫
爭太子雖不能全用然亦弗之罪也竟陵王深相器重
號為周舍太子左衛率沈約亦以述曾方之汲黯齊明
帝即位為永嘉太守為政清平不尚威猛昵俗便之所
部橫陽縣山谷嶮峻為逋逃所聚前後二千石討捕莫
能息述曾下車開示恩信凡諸凶黨襁負而出編戶屬
籍者二百餘家自是商旅流通居人安業述曾勵志清

白不受饋遺明帝下詔美之徵為游擊將軍郡送故舊錢二十餘萬一無所受惟得白桐木火龍朴十餘枚而已州民無老少皆出拜別號哭聞於數里東昏時拜中散中大夫還鄉里武帝踐阼乃輕行詣闕仍辭還江東帝下詔褒美以為太中大夫述曾生平所得奉祿皆以分施及老遂壁立無資以天監八年卒注易文言著雜詩賦數十篇後有吳興邱師施亦以廉潔稱罷臨安縣還惟有二十籠簿書並是倉庫券帖當時以此述曾位

至臺郎

孫謙字長遜東莞呂人也客居歷陽躬耕以養弟妹鄉里稱其敦睦仕宋為句容令清慎彊記縣人號為神明宋明帝擢為巴東建平二郡太守郡居三峽常以威力鎮之謙將述職勅募千人自隨謙曰蠻夷不賓蓋待之失節耳何煩兵役以為國費固辭不受入郡布恩惠之化蠻獠懷之競餉金寶謙慰諭而遣一無所納及掠得生口皆放還家俸秩出吏民恚原除之郡境翕然威信

大著視事三年徵還為撫軍中兵參軍遷越騎校尉征
北司馬府主建平王將稱兵患謙彊直託事遣使至都
然後作亂及建平誅遷左軍將軍齊初為錢唐令御煩
以簡獄無繫囚及去官百姓以謙在職不受餉遺追載
縑帛以送之謙辭不受每去官輒無私宅借空車廐居
焉永明初為江夏太守坐被代輒去郡繫尚方項之免
為中散大夫明帝將廢立欲引謙為心膂使兼衛尉給
甲仗百人謙不願處際會輒散甲士帝雖不罪而弗復

任焉天監六年為零陵太守年已衰老猶彊力為政吏人安之先是郡多猛獸暴人謙至絕迹及去官之夜猛獸即害居人謙為郡縣常勤勸課農桑務盡地利收入常多於鄰境九年以老徵為光祿大夫既至武帝嘉其清潔甚禮異焉每朝見猶請劇職自効帝笑曰朕使卿智不使卿力後十四年詔加優秩給親信二十人并給扶謙自少及老歷三縣五郡所在廉潔居身儉素牀施蘧蔭屏風冬則布被莞席夏月無幃帳而夜卧未嘗有

蝨蚋人多異焉年逾九十彊壯如五六十者每朝會輒先衆到公門力於仁義行已過人甚遠後兄靈慶嘗病寄謙謙行出還問起居靈慶曰向飲冷熱不調即時猶渴謙退遣其妻有彭城劉融行乞疾篤無所歸友人輿送謙舍謙開聽事以受之及融死以禮殯葬衆咸服其行義末年頭生二肉角各長一寸十五年卒官時年九十二臨終遺命誡諸子以氣絕即幅巾就葬棺足周身壙足容柩旒書爵里而已其旒表命數差可停息直尙

輜牀裝之以廢以常所乘者為魂車他無所用及卒帝
為舉哀甚悼惜之謙從子廉字思約父奉伯位少府卿
淮南大守廉便辟巧宦齊時已歷大縣尚書右丞天監
初沈約范雲當朝用事廉傾意奉之及中書舍人黃睦
之等亦尤所結附凡貴要每食廉必日進滋旨皆手自
煎調不辭勤劇遂得為列卿御史中丞晉陵吳興太守
廣陵高爽有險薄才客於廉廉委以文記爽嘗有求不
遂乃為履謎以喻廉曰刺鼻不知嚏蹋面不知嗔齧齒

作步數持此得勝人譏其不計恥辱以此取名位然處官平直遂以善政稱武帝嘗曰東莞二孫謙廉而已

何遠字義方東海郟人也父慧炬齊尚書郎遠仕齊為奉朝請豫崔慧景敗亡事抵尚書令蕭懿懿深保匿焉會赦出頃之懿遭難子弟皆潛伏遠求得懿弟融藏之既而發覺遠踰垣以免融遇禍遠家屬繫尚方遠遂亡度江因降魏入壽陽見刺史王肅求迎武帝肅遣兵援送武帝見遠謂張弘策曰何遠丈夫而能破家報舊德

未易人也武帝踐阼以奉迎勲封廣興男為後軍鄱陽王恢錄事參軍遠與恢素善在府盡其志力知無不為恢亦推心杖之恩寄甚密遷武昌太守遠本倜儻尚輕俠至是乃折節為吏杜絕交游饋遺秋毫無所受武昌俗皆汲江水盛夏遠患水溫每以錢買人井寒水不取錢者則撻水還之其他事率多如此迹雖似偽而能委曲用意車服尤弊素器物無雕漆江左水族甚賤遠每食不過乾魚數片而已然性剛嚴吏人多以細事受鞭

罰遂為人所訟徵下廷尉被劾十數條當時士大夫坐法皆不受測遠已無賊就測立三七日不款猶以私藏禁杖除名後為武康令愈勵廉節除淫祀正身率職人甚稱之太守王彬巡屬縣諸縣皆盛供張以待焉至武康遠獨設糗水而已彬去遠送至境進斗酒隻戴而別彬戲曰卿禮有過陸納將不為古人所笑乎武帝聞其能擢為宣城太守自縣為近畿大郡近代未之有也郡經寇抄遠盡心綏理復著名迹期年遷樹功將軍始興

內史時泉陵侯朗為桂州緣道多剽掠入始興界草木
無所犯遠在官好開途巷修葺墻屋民居市里城隍廐
庫所過若營家焉田秩奉錢並無所取歲暮擇人尤窮
者充其租調以此為常然其聽訟猶人也不能過絕而
性果斷人畏而惜之所至皆生為立祠表言政狀帝每
優詔答焉後歷給事黃門侍郎信武將軍監吳郡在吳
頗有酒失遷東陽太守遠處職疾彊富如仇讎視貧細
如子弟特為豪右所畏憚在東陽歲餘復為受罰者所

謗坐免歸遠性耿介無私曲居人間絕請謁不造詣與
貴賤書疏抗禮如一其所會遇未嘗以顏色下人以此
多為俗士所疾惡其清公實為天下第一居數郡見可
欲終不變其心妻子饑寒如下貧者及去東陽歸家經
年歲口不言榮辱士類益以此多之其輕財好義周人
之急言不虛妄蓋天性也每戲語人云卿能得我一妄
語則謝卿以一縑衆共伺之不能記也後為征西諮議
參軍中撫軍司馬卒

郭祖深襄陽人也武帝初起以客從後隨蔡道恭在司
州陷北還上書言境上事不見用還為長兼南梁郡丞
徙後軍行參軍帝溺情內教朝政縱弛祖深輿櫬詣闕
上封事二十九條其言僧尼害國蠹民語尤切直又請
斷界首將生口入北及關津廢替湏加糾擿又言廬陵
年少不宜鎮襄陽左僕射王暕在喪被起為吳郡曾無
辭讓其言深刻又請復郊四皇帝雖不能悉用然嘉其
正直擢為豫章鍾陵令員外散騎常侍普通七年改南

州津為南津校尉以祖深為之加雲騎將軍秩二千石使募部曲三千及至南州公嚴清刻由來王侯勢家出入津不忌憲綱俠藏亡命祖深搜檢姦惡不避彊禦動致刑辟奏江州刺史邵陵王太子詹事周捨贓罪遠近側足莫敢縱恣淮南太守畏之如上府常服故布襦素木案食不過一肉有饒餉一早青瓜祖深報以疋帛後有富人效之以貨祖深鞭以徇衆朝野憚之絕於干請所領皆精兵令行禁止有所討逐越境追禽江中嘗有

賊祖深自率討之列陣未敢進仍令所親人先登不時進斬之遂大破賊威振遠近長江肅清

後魏

張恂字弘讓上谷涅陽人幽州刺史贈太保袞之弟也袞自有傳道武為代王時恂隨袞歸國道武以恂參代王軍事恂言於道武曰自金運失御劉石紛紜慕容竊號山東苻姚盜器秦隴遂致三靈乏饗九域曠居大王植基朔北重明積聖自北而南化被燕趙今中土士民

望雲冀闕宜因斯會以建大業道武深器之厚加禮焉
皇始初拜中書侍郎帷幄密謀頗預參議賜爵平泉子
出為廣平太守恂招集離散勸課農桑流民歸之者數
千戶遷常山太守恂開建學校優禮儒士吏民歌詠之
於時亂離之後牧民者罕能克勵惟恂當官清白仁恕
臨下百姓親愛之其治為當時第一道武嘉之賜以金
帛明元即位徵拜太中大夫卒恂性清儉死日家無餘
財贈并州刺史平泉侯謚曰宣子純字道尚罷爵坐事

除純弟代字定燕陳留北平二郡太守卒贈營州刺史
謚惠侯代所歷著稱有父遺風代子長年為汝南太守
郡人劉崇之兄弟分析家貧惟一牛爭不能決訟於郡
庭長年悽而見之謂曰汝曹當以一牛故致此爭競脫
有二牛必不爭乃以已牛一頭賜之於是境中各相誠
約咸敦敬讓卒於郡子琛字寶貴少有孝行位至太子
翊軍校尉卒

張膺不知何許人也延興中為魯郡太守履行貞素妻

子採樵以自供孝文深嘉之遷京兆太守清白著稱得吏人之忻心焉

宋世景西河介休人河南尹翻之弟也翻自有傳世景少自修立事親以孝聞與弟道璵下帷讀誦博覽羣言尤精經義族兄弁甚重之舉秀才上第再遷彭城王勰開府法曹參軍勰愛其才學雅相器敬孝文甚嘉異之遷司徒法曹參軍世景明刑理著律令裁決疑獄剖決如流轉尚書祠部郎彭城王勰每稱曰宋世景精微尚

書僕射才也臺中疑事右僕射游肇常以委之世景既才長從政加之夙勤不怠無領數曹深著稱績左僕射源懷引為行臺郎巡察州鎮十有餘所黜降賞罰莫不咸允遷七鎮別置諸戍明設亭候以備不虞懷大相委重還薦之宣武以為不減李冲帝曰朕亦聞之後為伏波將軍行滎陽太守郡大姓鄭氏豪橫號為難制濟州刺史鄭尚弟遠慶先為宛陵令多所受納百姓患之而世景下車召而誡之遠慶行意自若世景繩之以法遠

慶懼棄官已走於是屬縣莫不改肅終日坐於廳事未嘗寢息人間之事巨細必知發姦擿伏有若神明嘗有一吏休滿還郡食人雞豚又有一幹受人一帽又食二雞世景叱而告之吏幹叩頭伏罪於是上下震悚莫敢犯禁坐弟道璵事除名世景友于之性過絕於人及道璵死哭之酸感行路歲餘母喪遂不勝哀而卒世景曾撰晉書竟未得就遺腹子季儒位太學博士曾至譙宋間為文弔嵇康甚有理致後夜寢室壞壓而殞時人悼

傷惜之道璵少而敏俊自太學博士轉京兆王愉法曹
行參軍坐愉反得罪作詩及挽歌詞寄之朋親以見寬
痛道璵又曾贈著作郎張始均詩其末章云予深懷璧
憂余有當門病道璵既不免難始均亦遇世禍時咸怪
之道璵從孫孝工學涉亦好輯綴文藻形貌短陋而好
臧否人物時論甚疾之為齊壯平王文學求入文林館
不遂回非毀朝士撰朝士別錄二十卷會周武滅齊改
關東風俗傳更廣聞見勒成三十卷以上之言多妄謬

篇第冗雜無著述體周大象末預尉遲迴事誅死

路邕陽平人也宣武時除東魏郡太守涖政清勤經年
儉日出家粟賑賜貧窘靈太后下詔褒美賜龍廐馬一
疋衣一襲被褥一具稍遷南青州刺史卒

閻慶允不知何許人也為東秦州敷城太守頻年饑儉
慶允歲常以家粟千石賑恤貧窮人賴以濟部人陽寶
龍一千餘人申頌美政有司以聞靈太后卒無褒賞
明亮字文德平原高昌人也有識幹歷員外常侍延昌

中宣武臨朝堂親自黜陟授亮勇武將軍亮進曰臣本
官常侍是第三清今授臣勇武其號至濁且文武又殊
請更改授帝曰九流之內人咸君子卿獨欲乖衆妄相
清濁所請未可亮曰今江左未賓書軌宜一方為陛下
投命前驅拓定吳會官爵陛下之所輕賤命微臣之所
重陛下方收所重何惜所輕因請改授平遠將軍帝曰
運籌用武然後遠人始平卿但用武平之何患不得平
遠乎亮乃陳謝而退除陽平太守清白愛人甚有惠政

轉汲郡太守為政如前舉宣遠近卒二郡人吏迄今追思之

杜纂字榮孫常山九門人也少以清苦自立時縣令齊羅喪亡無親屬收殮纂以私財殯葬由是郡縣標其門閭後居父喪盡禮郡舉孝廉稍除積弩將軍從征新野及南陽平以功賜爵并陘男賞帛五百疋數日之中散之知友時人稱之歷武都漢陽二郡太守並以清白為名明帝初拜清河內史性儉約尤愛貧老問民疾苦至

有對之涕泣勸習農桑親自檢視勤者賞以物帛惰者
加以罪譴弔死問生甚有恩紀除東益州刺史無御邊
威略羣氏反叛以失人和徵還遷太中大夫正光末清
河人房通等三百人頌纂德政乞重臨郡詔許之孝昌
中為葛榮圍逼以郡降榮以為常山太守榮滅卒於家
纂所歷任好行小惠蔬食弊衣多涉誣矯而輕財潔已
終無受納為百姓所思號為良守天平中贈定州刺史
裴佗字元化河東聞喜人也六世祖說仕晉位太常卿

因晉亂避地涼州苻堅平河西東歸因居解縣世以文學顯五舉秀才再舉孝廉時人美之父景惠州別駕佗容貌魁偉隤然有器望舉秀才以高第除中書博士累遷趙郡太守為政有方威惠甚著狡吏姦人莫不改貫所得俸祿分卹貧窮轉前將軍荊州刺史郡人戀仰傾境餞送蠻酋田盤石田敬宗等部落萬餘家恃衆阻險不賓王命前後牧守未能降款佗至州單使宣慰示以禍福敬宗聞風歸附於是合境清晏襁負至者千餘家

後加中軍將軍以老乞還卒遺令不聽請贈不受贈祿諸子皆遵行之佗性剛直不好與俗人交遊其投分者必當時名勝清白任真不事家產宅不過三十步又無田園暑不張蓋寒不衣裘其貞儉若此子讓之誨之俱知名齊史有傳

竇瑗字世珍遼西陽洛人也自言本出扶風平陵漢大將軍武曾孫崇為遼西太守遂家焉曾祖堪慕容氏漁陽太守祖表馮弘城周太守入魏父罔舉秀才早卒普

泰初瑗啓以身階級為父請贈詔贈平州刺史瑗年十七便荷帙從師遊學十載始為御史後兼太常博士拜太原王爾朱榮官榮留為北道大行臺左丞以拜榮官賞新昌男從榮東平葛榮封容城縣伯瑗乞以容城伯讓兄叔珍詔聽以新昌男轉授之叔珍由是位至泰山太守爾朱世隆等立長廣王暉為主南赴洛陽至東郭外世隆等遣瑗奏廢之瑗執鞭獨入禁內奏願行堯舜事暉遂禪廣陵由是除給事黃門侍郎孝武帝時為廷

尉卿及釋奠開講瑗與溫子昇魏李景李業興並為摘
句天平中除廣宗太守政有清白之稱廣宗人情凶戾
累政咸見告訟惟瑗一人終始全潔轉中山太守聲譽
甚美為吏民所懷及齊神武班書州郡稱瑗政績以為
勸勵後授平州刺史在州政如臨郡又為神武丞相府
右長史瑗無軍府斷割才不甚稱職又行晉州事及還
鄴上表曰臣伏讀麟趾新制至三公曹第六十六條毋
殺其父子不得告告者死三反覆之未得其門何者案

律子孫告父母祖父母者死又漢宣云子匿大父母皆
勿論蓋謂父母祖父母小者攘羊甚者殺害之類恩須
相隱律抑不言法理如是足見其直未必指母殺父止
子不言也今母殺父而子不告便是知母而不知父識
比野人義近禽獸且母之於父作合如天旣殺已之天
復殺子之天二天俱毀豈容頓默此母之罪義不在赦
下手之日母恩即離仍以母道不告鄙臣所以致惑如
或有之可臨時議罪何用豫制斯條用為訓誡恐千載

之下談者諠譁以明明大朝有尊母卑父之論以臣管
見實所不取詔付尚書三公郎封君義立判云母殺其
父子復告母由告死便是子殺天下未有無母之國
不知此子將欲何之既於法無違於事非害宣布有司
謂不宜改瑗復難云局判云母由告死便是子殺天下
未有無母之國不知此子將欲何之瑗案典律未聞母
殺其父而子有隱母之義既不告母便是與殺父同天
下可有無父之國此子獨得有所之乎事雖停寢除大

宗正卿宗室以其寒士相與輕之瑗案法推正甚見讎疾官雖通顯貧窘如初清尚之操為時所重領本州大中正兼廷尉卿卒官贈太僕卿濟州刺史謚曰明

羊敦字元禮泰山鉅平人也伯父祉光祿大夫父靈引為京兆王愉冀州長史愉反靈引見害祉靈引各有傳敦性尚閑素學涉書史以父死王事除給事中出為本州別駕公平正直見非法終不判署後為衛將軍廣平太守甚有能名姦吏跼蹐秋毫無犯雅性清儉屬歲饑

家餽未至使人外尋陂澤採藕根食之遇有疾苦家人解衣質米以供之然政尚威嚴朝廷以其清白賜穀一千斛絹一百疋卒官吏民奔哭莫不悲慟贈衛大將軍吏部尚書兗州刺史謚曰貞武定初齊神武以敦及中山太守蘓淵在官奉法清約自居宜見追襲乃上言請加旌錄詔各賞帛一百疋粟五百斛下郡國咸使聞知焉

蘓淑字仲和武邑人也兄壽興坐事為閹官後拜河間

太守賜爵晉陽男及壽興將卒遂冒養淑為子淵熙平
中罷其爵後除樂陵內史在郡綏撫甚有人譽後謝病
乞解有詔聽之民吏老幼訴乞淑者甚衆後歷滎陽中
山二郡太守卒淑清心愛下所歷三郡皆為吏民所思
當時稱為良二千石武定初贈衛大將軍都官尚書瀛
州刺史謚曰懿齊神武追美清掾與羊敦同見優賞

壯齊

張華原字國滿代郡人也少明敏有器度神武開驃騎

府引為法曹參軍賜爵新城伯仍侍左右從於信都為
丞相府屬深被親遇每號令三軍恒令宣諭意旨尋除
散騎常侍周文之始據雍州也神武欲以逆順曉之使
華原入關說焉周文密有拘留之意謂之曰若能屈驥
足於此當共享富貴不爾命懸今日華原曰渤海王命
世誕生殆天所縱以明公篡命關右便自隔絕故使華
原銜命相喻公不以此日改圖轉禍為福乃欲以死脅
人乎周文嘉其亮直乃使東還尋而悔之遣追不及神

武以華原久而不返每歎惜之及聞其來喜見於色後除相府右長史遷驃騎大將軍特進進爵為公仍徙封新安後為兗州刺史華原有幹略達政體至州乃廣布耳目示以威禁境內大賊及隣州亡命三百餘人皆詣華原歸款咸撫以威信放歸田里於是人懷感附寇盜寢息州獄先有繫囚千餘人華原科簡輕重隨事決遣至年暮惟有重罪者數十人華原各給假五日令歸曰期盡速還也因等曰有君如是何忍背之依期畢至先

時州境數有虎為暴自華原臨政州東北七十里甌山中忽有六駁食虎咸以為化感所致後卒官州人號慕為樹碑立祠四時享祭焉贈尚書左僕射子宰均嗣

宋世良字元友西河介休人也世為著姓父毓字道和敦篤有志行卒於太中大夫世良年十五便有膽氣後隨伯父翻在南兖州屢有戰功魏行臺臨淮王彧與語奇之朝廷以爾朱榮有不臣跡孝莊將圖之密令彧將兵赴洛彧在梁郡稱疾假世良都督令還南兖發兵以

聽期世良請簡見兵三千騎五日必到洛陽并陳三策
或皆不能從焉尋為殿中侍御史詣河北括戶大獲浮
惰見汲郡城傍多骸骨移書州郡悉令收瘞其夜甘雨
滂沱河內太守田怙贓貨百萬世良檢案之未竟遇赦
而還孝莊勞之曰知卿所括得丁倍於本帳若官人皆
如此用心便是更出一天下也其後遷殿中世良奏殿
中主齋會之事請改付餘曹帝曰卿意不欲親庖厨邪
宜付右兵以為永式河州刺史梁景獻袍罕羌首恃遠

不敬其賀正使人頻年稱疾秦州刺史侯莫陳悅受其
贈遺常為送表世良並奏科其罪帝嘉之謂長孫永業
曰宋郎中實有家風甚可重也後拜清河太守世良才
識閑明尤善政術在郡未幾聲聞甚高陽平郡移掩劫
盜三十餘人世良訊其情狀惟送十二人餘皆放之陽
平太守魏明朗大怒云輒放吾賊及推問送者皆實放
者皆非明朗大服郡東南有曲隄成公一姓阻而居之
羣盜多萃於此人為之語曰寧渡東吳會稽不歷成公

曲隄世良施八條之制盜奔他境民又為謠曰曲隄雖
險賊何益但有宋公自屏跡天保初大赦郡先無一囚
率羣吏拜詔而已獄內櫓生桃樹蓬蒿亦滿每日牙門
虛寂無復訴訟者人謂之神門其冬醴泉出於界內及
代至傾城祖道有老人丁金剛者泣而前謝曰老民年
九十記三十五府君非惟府君善政清亦徹底今失賢
君民何以濟莫不攀轅涕泣除東郡太守卒官贈信州
刺史世良彊學好屬文撰字略五篇宋氏別錄十卷子

伯宗位侍御史性清退好學多所撰述至齊亡不徙職
遂不入仕隋大業初卒於家世良弟世軌自有傳

郎基字世業中山新市人也祖智魏魯郡太守贈兗州
刺史父道恩開府陽平郡守基身長八尺美鬚髯汎涉
墳籍尤長吏事起家奉朝請累遷海西鎮將遇東方白
額稱亂淮南州郡皆從逆梁將吳明徹率衆攻圍海西
基率勵兵民固守百餘日軍糧且罄戎杖亦盡乃至削
木為箭翦紙為羽圍解還朝僕射楊愔乃迎勞之曰卿

本文吏遂有武略削木翦紙皆無故事班墨之思何以
相過御史中丞畢義雲引為侍御史趙州刺史尉粲文
宣外弟揚州刺史郭元真楊愔妹夫基不憚權威並劾
其贓罪皇建初除鄭州長史帶潁川郡守郡西界與周
接境因侯景背叛其東西分隔士人因緣姻舊私相貿
易而禁格嚴重犯者非一基初蒞職披檢條格多是權
時不為久長州郡因循失於請讞致密網久施得罪者
衆遂條件申臺省仍以情量事科處自非極刑一皆放

決積年留滯案狀膠加數日之中剖判咸盡而臺省報
下並允基所陳條網既疎獄訟清淨官民遐邇皆相慶
悅基性清慎無營求嘗語人曰任官之所木枕亦不須
作況重於此乎惟頗令人寫書潘子義曾遺之書云在
官寫書亦是風流罪過基答曰觀過知仁斯亦可矣卒
於官贈驃騎大將軍和州刺史謚曰惠棺柩將還遠近
赴送莫不攀轅悲哀哀不自勝初基任瀛州騎兵時陳
元康為司馬畢義雲為屬與基並有聲譽為刺史元崱

所目曰三賢俱有當世才後來皆當遠至惟郎騎兵任
真過甚恐不足自達陳畢後並貴顯而基位止郡守基
子茂隋史有傳

孟業字敬業鉅鹿安國人也家本寒微少為州吏性廉
謹同僚諸人侵盜官絹分三十疋與業業拒而不受行
臺郎中郭秀甚相禮接方欲薦之會秀卒魏彭城王韶
神武之壻也拜定州刺史除業為典籤長史劉仁之謂
業曰我處其外君居其內同心戮力庶有濟乎未幾仁

之入為中書令臨路啓韶云殿下左右可信任者惟有
孟業願專任之餘人不可信也又與業別執手曰今我
出都君便失援恐君在後不自保全惟正與直願君自
勉業惟有一馬瘦死韶以業貧令州府官人同食馬肉
欲令厚相酬償業固辭不敢韶乃戲業曰卿邀名人也
對曰業為典籤州中要職諸人欲相賄賂止患無方便
耳今喚食肉恐致聚斂有損聲名所以仰違明教後未
旬日韶左右王四德董惟金並以馬死託肉為長史裴

英密啓神武有書與韶大致誚讓業尋被譖出外行縣
事後神武書責韶云典籤姓孟者極能用心何乃令出
外也及韶代下業亦隨還贈送一無所受仁之後為西
兗州臨別謂吏部郎中崔暹曰貴州人士惟有孟業銓
舉之次不可忘也暹問業曰君往在定州有何政使劉
西兗如此欽歎業答曰惟知自修也韶為并州刺史業
復為典籤仍兼長史天保初清河王岳拜司州牧召為
法曹業形貌短小及謁見岳心鄙其眇小笑而不言後

尋業斷決處謂曰卿斷決之明可謂有過軀貌之用補
河間王國郎中令清貧自守未曾有失文宣謂侍中裴
英起曰卿識河間王郎中孟業不一昨見其國司文案
似是好人對曰昔與臣同事魏彭城王元韶其人清忠
正直世所希有帝曰如公言者比來便是大屈遂除中
書舍人文宣初惟得姓名及因奏事見其羸老又質性
敦朴無升降之容加之平緩寡於方便有一道士由吾
道榮以術藝被迎將入內業為通名忽於衆中抗聲奏

云由吾道士不食五穀帝命推而下之又令點校百官
數奏失所帝遣人以馬鞭擊業頭至於流血然亦體其
衰老非力所堪皇建二年累遷東郡太守以寬惠著名
其年夏五官張凝因出使得麥一莖五穗其餘或三穗
四穗共一莖者合郡咸以政化所感因即申上至秋復
有東燕縣人班暎祖送嘉禾一莖九穗河清三年勅民
間養驢催買甚切業曰吾旣為人父母豈可坐看此急
令宜權出庫錢貸人取辦後日有罪吾自當之後為憲

司所劾被攝之日郡人皆泣而隨之迭相弔慰送業度
關者有數百人至黎陽郡西方得辭決攀轅號哭悲動
行路詣闕訴寃者非一人勅乃放還郡中父老扣河迎
接武成親戎自洛還鄴道由東郡業具牛酒率人吏拜
謁路傍自稱冀土臣孟業伏惟聖駕親行有征無戰謹
上徽禮便與人吏俱唱萬歲導引前入帝大嘉之後除
廣平太守年既老理政不如在東郡時武平九年為太
中大夫加衛將軍尋卒業志守質素不尚浮華為子結

婚於朝肺腑吒羅氏其子以蔭得官為平原王段孝先
相府行參軍乃令作今世服飾綺襦紈袴吒羅家又恃
姻婭炫曜矜誇業知而不禁素望頗貶

崔伯謙字士遜博陵安平人也祖櫟行博陵太守父文
業中書郎鉅鹿太守伯謙幼孤居貧養母神武起晉陽
召補相府功曹稱之曰崔伯謙清直奉公真良佐也轉
七兵殿中左戶三曹郎中弟仲讓為北豫州司馬與高
慎同叛伯謙坐免官後歷瀛州別駕京畿司馬文襄將

之晉陽勞之曰卿騁足瀛部已著康歌督府務繁是用
相授臨別又馬上執手曰執子之手與子偕老卿宜深
體此情族弟暹當時寵要伯謙與之舊僚同門非吉凶
未嘗造請之以雅道自居天保初除濟北太守恩信大
行富者禁其奢侈貧者勸課周給縣公田多沃壤伯謙
咸易之以給民又改鞭用熟皮為之不忍見血示恥而
已朝貴行過郡境問人曰太守政何似對曰府君恩化
古者所無誦人為歌曰崔府君能臨政退田易鞭布威

德人無爭客曰旣稱恩化何因復威對曰長吏憚其威
嚴人庶蒙其恩惠故兼言之以相府舊僚例有加授徵
赴鄴百姓號泣遮道數日不得前以弟仲讓在關中不
復居內任除南鉅鹿太守下車導以禮讓豪族皆改心
整肅事無巨細必自親覽在縣有貧弱未理者皆曰我
自告白鬚公不慮不決在郡七年獄無停囚每有大使
巡察恒處上第徵拜銀青光祿大夫伯謙少時讀經史
晚年好老莊容止儼然無愠色親朋至則置酒相娛清

言不及俗事士大夫以為儀表卒贈南充州刺史謚曰懿伯謙弟仲讓仕西魏位至鴻臚少卿

蘓瓊字珍之長樂武彊人也父備仕魏至衛尉少卿瓊幼時隨父在邊嘗謁東荊州刺史曹芝芝戲問曰卿欲官不對曰設官求人非人求官芝異其對署為府長流參軍文襄以儀同開府引為刑獄參軍每加勉勞并州嘗有彊盜長流參軍張流推其事所疑賊徒並已拷伏失物家並識認惟不獲盜賊文襄付瓊更令窮審乃別

推得元景融等十餘人并獲賊驗文襄大笑語前妄引賊者曰爾輩若不遇我好參軍幾致枉死除南清河太守郡多盜賊及瓊至奸盜止息或外境奸罪輒從界中行過者無不捉送零陵縣民魏雙成住處與畿內武城交錯失牛疑其村人魏子賓列送至郡一經窮問即知非子賓盜便釋之雙成云府君放賊去百姓牛何可得瓊不理其語密遣訪獲盜者從此畜牧多散放不收云但付府君其隣郡富家將財物寄置界內以避盜冀州

繹幕縣人成氏大富為賊攻急告曰我物已寄置蘓公
矣賊遂去平原郡有妖賊留黑苟構結徒侶通於滄海
瓊所部人連接村居無相染累隣邑於此伏其德績郡
中舊賊一百餘人悉充左右人間善惡及長吏飲人一
盃酒無不即知瓊性清慎不發私書道人道研為濟州
沙門統資產巨富在郡多有出息常得郡縣為徵及欲
求謁瓊度知其意每見則談問元理應對肅恭研雖為
債數來無由啓口其弟子問其故研曰每見府君徑將

入青雲間何由得論地上事師徒還歸遂焚債券郡人
趙頴曾為樂陵太守年餘八十致仕歸五月中得新瓜
一雙自來奉瓊頴恃年老苦請遂便為留仍致於聽事
梁上竟不割人聞受趙頴餉瓜欲貢新果至門問知頴
瓜猶在相顧而去有百姓乙普明兄弟爭田積年不斷
各相援據乃至百人瓊召普明兄弟對衆人諭之曰天
下難得者兄弟易求者田地假令得地失兄弟心如何
因而下淚諸證人莫不灑泣普明兄弟叩頭乞外更思

分異十年即還同住每年春總集大儒衛顗隆田元鳳
等講於郡學朝吏文案之暇悉令授書時人指吏曹為
學生屋禁斷淫祀婚姻喪葬皆教令儉而衷禮又蠶月
預下綿絹度樣於部內其兵賦次第並立明式至於調
役事必先辦郡縣吏長恒無十杖稽失當時州郡無不
遣人至境訪其政術天保中郡界大水民災絕食者千
餘家瓊普集郡中有粟家自從貸粟悉以給付饑者州
計戶徵租復欲推其貸粟綱紀謂瓊曰雖矜饑餒恐罪

累府君瓊曰一身獲罪直活千室何所怨乎遂上表陳
狀使檢皆免人戶保安此等相撫兒子咸言府君生汝
在郡六年民庶懷之州前後四表列為尤最遭憂解職
故人贈遺一無所受尋起為司直廷尉正朝士嗟其屈
尚書辛術曰既直且正名以定體不慮不申初瓊任清
河太守裴獻伯為濟州刺史獻伯酷於用法瓊恩於養
人房延祐為樂陵郡過濟州裴問其外聲延祐云惟聞
太守善刺史惡裴云得人譽者非至公答云若爾黃霸

龔遂君之罪人也後有勅州各舉清能裴以前言恐為
瓊陷瓊申其枉滯議者尚其公平畢義雲為御史中丞
以猛暴任職理官忌憚莫敢有違瓊推察務在得雪者
甚衆寺署臺案始自於瓊遷三公郎中趙州及清河南
中有人頻告謀反前後皆付瓊推檢事多申雪尚書崔
昂謂瓊曰若欲立功名當更思餘理仍數雪反遂身命
何輕瓊正色曰所雪者冤枉不放反遂昂大慙京師為
之語曰斷決無疑蘓珍之皇建中賜爵安定縣男徐州

行臺左丞行徐州事徐州城中五級寺忽被盜銅像一
百軀有司徵檢四隣防宿及蹤跡所疑逮繫數十人瓊
一時放遣寺僧怨訴不為推賊瓊遣僧謝曰但且還寺
得像自送爾後十日抄賊姓名及贓處所徑收掩悉獲
實驗賊徒款引道俗歎服舊制以淮禁不聽商販輒渡
淮南歲儉啓聽淮北取糴後淮北人饑復請通糴淮南
遂得商估往還彼此兼濟水陸之利通於河北後為大
理卿而薨亡仕周為博陵太守隋開皇初卒

房豹字仲幹清河東武城人也曾祖法壽魏冀州刺史
祖伯祖齊郡內史父翼宗安太守豹體貌魁岸美音儀
年十七州辟主簿王思政入據潁川慕容紹宗出討豹
為紹宗開府主簿兼行臺郎中紹宗自云有水厄遂於
戰艦中浴并自投於水冀以厭當之豹白紹宗曰天命
也在天豈人理所能延保公若實有水厄非禳辟所能
却若其實無何禳之有今三軍之事在於明公惟應達
命任理以保元吉方乃乘船入水云以防災豈如岝上

指麾以保萬全也紹宗笑曰不能免俗為復爾耳未幾而紹宗遇溺時論以豹為知微清河中除謁者僕射拜西河太守地接周境俗雜稽胡豹政貴清靜甚著聲績遷博陵太守甚有能名又遷樂陵太守風教修理稱為美政郡瀕海水味多鹹苦豹命鑿一井遂得甘泉遐邇以為政化所致豹罷歸後井味復鹹齊滅遂還本鄉邱園自養頻被徵命固辭以疾每牧守初臨必遣致禮官佐邑宰皆投刺申敬終於家無子以兄熊子彥調嗣彥

訓明辯有學識位殿中侍御史千乘益都二縣令有惠政

路去病陽平人也風神踈朗儀表瓌異河清初為殿中侍御史彈劾不避貴戚以正直知名時勅用士人為縣宰以去病為定州饒陽縣令去病明閑時務性頗嚴毅人不敢欺然至廉平為吏民歎伏武平四年為成安縣令都下有鄴臨漳成安三縣輦轂之下舊號難為重以政亂時艱綱紀不立近臣內戚請屬百端去病消息事

宜以理抗答勢要之徒雖厮養小人莫不憚其風格亦不至嫌恨自遷鄴以還三縣令政術去病獨為稱首周武平齊重其能官與濟陰郡守公孫景茂二人不被替代發詔褒揚去病後以尉遲迴事隋大業初卒於冀氏縣令

隋

梁彥光字修芝安定烏氏人也祖茂魏秦華二州刺史父顯周荊州刺史彥光少岐嶷有至性其父每謂所親

曰此兒有風骨當興吾宗七歲時父遇篤疾醫云餌五石可愈時求紫石英不得彥光憂瘁不知所為忽於園中見一物彥光所不識怪而持歸即紫石英也親屬咸異之以為至孝所感魏大統末入學略涉經史有規檢造次必以禮解褐祕書郎周受禪遷舍人上士武帝時累遷小馭下大夫母憂去職毀瘠過禮未幾令起視事帝見其毀甚嗟歎久之後為御正下大夫從帝平齊以功授開府陽城縣公宣帝即位拜華州刺史進封華陽

郡公以陽城公轉封一子後拜柱國青州刺史屬帝崩不之官高祖受禪以為岐州刺史兼領官監甚有惠政嘉禾連理出於州境上嘉其能下詔褒美賜粟五百斛帛物三百段御傘一枚以勵清正後轉相州刺史彥光前在岐州其俗頗質以靜鎮之合境大安奏課連最為天下第一及居相部如岐州法鄴都雜俗人多變詐為之作歌稱其不能理政上聞而譴之竟坐免歲餘拜趙州刺史彥光言於上曰臣前待罪相州百姓呼為戴帽

錫臣自分廢黜無復衣冠之望不謂天恩復加收採臣
請復為相州改絃易調庶有以變其風俗上從之復為
相州刺史豪猾者聞彥光自請而來莫不嗤笑彥光下
車發摘奸隱有若神明狡猾莫不潛竄於是合境大駭
初齊亡後衣冠士人多遷關內惟伎巧商販及樂戶之
家移實州郭由是人情險詖妄起風謠訴訟官人萬端
千變彥光欲革其弊乃用秩俸之物招致山東大儒每
鄉立學非聖哲之書不得教授常以季月召集之親臨

策試有勤學異等聰令有聞者升堂設饌其餘並在廊下有
好諍訟情業無成者坐之庭中設以草具及大比當舉行
賓貢之禮又於郊外祖道并以財物資之於是人皆刻勵風
俗大改有滄陽人焦通性酗酒事親禮缺為從弟所訟彥光
弗之罪將至州學令觀孔子廟於時廟中有韓伯瑜母杖不
痛哀母力衰對母悲泣之像通遂感悟悲愧若無所容者
彥光訓諭而遣之後改過勵行卒為善士吏人感悅略無
諍訟卒官贈冀定瀛青四

州刺史謚曰襄子文謙嗣弘雅有父風以上柱國世子
例授儀同歷上饒二州刺史遷鄱陽太守稱為天下之
最徵拜戶部侍郎遼東之役領虎賁郎將為廬龍道軍
副會楊元感作亂其弟虎賁郎將元縱先隸文謙元感
反問未至而元縱逃走文謙不之覺坐是配防桂林而
卒少子文讓初封陽城縣公後為鷹揚郎將從衛元擊
楊元感於東都力戰而死贈通議大夫

樊叔略陳留人也父觀仕魏為南兗州刺史河陽侯為

高氏所誅叔略被腐刑給使殿省身長九尺有志氣頗見忌內不自安遂奔關西周文器之引置左右授都督襲爵為侯大冢宰宇文護執政引為中尉漸被委信兼督內外位開府儀同三司護誅齊王憲引為園苑監數進兵謀憲甚奇之從武帝平齊以功加上開府封清鄉縣公拜汴州刺史號為明決宣帝營建東都以叔略有巧思拜營構監宮室制度皆叔略所定尉遲迴之亂鎮大梁以軍功拜大將軍復為汴州刺史高祖受禪加位

上大將軍進爵安定郡公在州數年甚有聲稱遷相州
刺史政為當時第一上降璽書褒美之賜以粟帛班示
天下百姓為之語曰智無窮清鄉公上下正樊安定徵
拜司農卿吏民莫不流涕相與立碑頌德自為司農凡
所種植叔略別有條制皆出人意表朝廷有疑滯公卿
所未能決者叔略輒為評理雖無學術有所依據然師
心獨見闇與理合甚為上所親委高頴楊素皆禮遇之
叔略雖為司農往往參贊九卿事性頗豪侈每食方丈

畢備水陸十四年從祀泰山至洛陽上令錄囚徒將奏
晨至獄門於馬上暴卒上嗟悼久之贈亳州刺史謚曰
襄

趙軌河南雒陽人也父肅魏散騎常侍自有傳軌少好
學有行檢仕周為蔡王記室以清苦聞高祖受禪為齊
州別駕有能名其東鄰有桑椹落其家軌遣人悉拾還
其主誠其諸子曰吾非以此求名意者非機杼之物不
願侵人汝等宜以為戒在州四年考績連最持節使者

郃陽公梁子恭上狀高祖賜以粟帛甚優令入朝父老
將送者各揮淚曰別駕在官水火不與百姓交是以不
敢以壺酒相送公清若水是以請酌一杯水奉餞軌受
而飲之至京詔與牛弘撰定律令格式時衛王爽為原
州總管召為司馬在道夜行其左右馬逸入田中暴人
禾軌駐馬待明訪知禾主酬直而去原州人吏聞之莫
不改操後檢校硤州刺史甚有恩惠轉壽州總管長史
芍陂舊有五門堰蕪穢不修軌於是勸課吏民更開三

十六門灌田五千餘頃人賴其利秩滿歸卒於家子弘
安弘智並知名

房恭懿字慎言河南洛陽人也父謨魏贈司空前史有
傳恭懿沉深有局量達於後政仕齊歷平恩令濟陰守
並有能名齊亡不得調後預尉遲迴亂廢於家開皇初
吏部尚書蘓威舉為新豐令政為三輔之最上聞而嘉
之賜物四百段恭懿以所得賜分給窮乏未幾復賜粟
三百石恭懿又以賑貧人上聞而止之時雍州諸縣令

每朔朝謁上見恭懿必呼至榻前訪以治民之術威又薦之歷澤德二州司馬盧愷復奏恭懿政為天下之最上甚異之復賜以帛因謂諸州朝集使者曰房恭懿志在體國愛養我百姓此乃上天宗廟之所佑助豈朕寡薄能致之乎朕即拜為刺史當令天下模範之卿等宜師效也乃下詔褒美因授海州刺史未幾國子博士何妥奏恭懿尉遲迴之黨蘓威盧愷曲相舉薦上大怒恭懿竟放嶺南未幾徵還至洪州卒論者寃之

公孫景茂字元蔚河間阜成人也容貌魁梧少好學博涉經史在魏察孝廉射策甲科稍遷太常博士多所損益時人稱為書庫歷高唐令大理正俱有能名齊滅周武帝聞而召見與語器之授濟北太守以母憂去職開皇初召拜汝南太守郡廢為曹州司馬遷息州刺史法令清靜德化大行屬平陳之役征人在路病者景茂減俸祿為饘粥湯藥多方振濟之賴全活者千數上聞而嘉之詔宣示天下十五年上幸洛陽景茂謁見時年七

十七上命升殿坐問其年哀其老嗟歎久之景茂再拜
曰呂望八十而遇文王臣踰七十而逢陛下上甚悅下
詔褒美之加上儀同伊州刺史明年以疾徵吏人號泣
於道及疾愈復乞骸骨又不許轉道州刺史悉以秩俸
買牛犢雞豬散惠孤弱不自存者好單騎巡人家至戶
入閱視百姓產業有修理者於都會時乃褒揚稱述如
有過惡隨即訓導而不彰也由是人行義讓有無均通
男子相助耕耘婦女相從紡績大村或數百戶皆如一

家之務其後請致仕上優詔許之仁壽中上明公楊紀
出使河北見景茂神力不衰還以狀奏於是就拜淄州
刺史賜以馬輦便道之官前後歷職皆有德政論者稱
為良牧大業初年八十七卒謚曰康身死之日諸州人
吏赴喪者數千人或不及葬皆望墳慟哭野祭而去

辛公義隴西狄道人也祖徽魏徐州刺史父季慶青州
刺史公義早孤為母氏所養親授書傳周天和中選良
家子任太學生武帝時召入露門學令受道義每月集

御前令與大儒講論上數嗟異時輩慕之建德初授宣
納中士從平齊累遷掌治上士埽寇將軍高祖作相授
內史上士參掌機要開皇元年除主客侍郎攝內史舍
人賜爵安陽縣男轉駕部侍郎使勾檢諸馬牧所獲十
餘萬疋上喜曰惟我公義奉國罄心從軍平陳以功除
岷州刺史土俗畏病若一人有病即合家避之父子夫
妻不相看養孝義道絕由是病者多死公義患之欲變
其俗因分遣官人巡檢部內凡有疾病者以牀輿來安

置聽事暑月疫時病人或至數百廳廊悉滿公義親設一榻獨坐其間終日連夕對之理事所得秩俸盡用市藥迎醫療之躬勸其飲食於是悉差方召其親戚而喻之曰死生由命不關相者前汝棄之所以死耳今我聚病者坐卧其間若言相染那得不死病既復差汝等勿復信之諸病家子孫慙謝而去後人有遇疾者爭就使君其家親屬固留養之始相慈愛此風遂革合境之內呼為慈母後遷并州刺史下車先至獄中因露坐牢側

親自驗問十餘日間決斷咸盡方還大聰受領新訟皆不立文案遣當直佐僚一人側坐訊問事若不盡應須禁者公義即宿聽事終不還閤人或諫之曰此事有程使君何自苦也答曰刺史無德何以導人尚令百姓繫於囹圄豈有禁人在獄而心自安乎罪人聞之咸自歎服後有欲諍訟者鄉閭父老遽相曉曰此盖小事何忍勞苦使君訟者多兩讓而止時山東霖雨自陳汝至於滄海皆苦水災境內犬牙獨無所損山出黃銀獲之以

獻詔水部郎婁蔚就公義禱焉乃聞空中有金石絲竹之響仁壽元年追充揚州道黜陟大使豫章王暕恐其部內官寮犯法未入郡境豫令使屬之公義答曰不敢有私及至揚州皆無所縱捨暕銜之及煬帝即位揚州長史王弘入為黃門郎因言公義之短竟去官吏人守闕訴冤相繼不絕後數歲帝悟除內史侍郎丁母憂未幾起為司隸大夫檢校右禦衛虎賁郎將從征至柳城郡卒子融

柳儉字道約河間解人也祖元璋魏司州大中正相華
二州刺史父裕周聞喜令儉有局量立行清苦為州里
所敬雖至親昵無敢狎侮仕周厯宣納上士畿伯大夫
及高祖受禪擢拜水部侍郎封率道縣伯未幾出為廣
漢太守甚有能名俄而郡廢時帝勵精思治妙簡良能
出為牧宰儉以仁明著稱擢拜蓬州刺史獄訟者庭決
遣之佐吏從容而已獄無繫囚蜀王秀時鎮益州列上
其事遷邛州刺史在職十餘年人夷悅服蜀王秀之得

罪也儉坐與交通免職及還鄉妻子衣食不贍見者咸
歎伏焉煬帝嗣位徵之於時多以功臣任職牧守領郡
者並帶戎資惟儉起自良吏帝嘉其績特授朝散大夫
弘化太守儉清節愈勵大業五年入朝郡國畢集帝謂
納言蘓威吏部尚書牛弘曰其中清名天下第一者為
誰威等以儉對帝又問其次威以涿郡贊務郭絢潁川
贊務敬肅等二人對帝賜儉帛二百疋絢肅各一百疋
令天下朝集使送至郡邸以旌異焉論者美之及大業

末盜賊蜂起數被攻逼儉撫結人夷卒無離叛竟以保全及唐兵至長安尊立恭帝儉與留守李粲縞素於州南向慟哭既而歸京師相國李淵賜儉物三百段就拜上大將軍歲餘卒於家時年八十九郭絢河東安邑人家世寒微初為尚書令史後以軍功拜儀同厯數州司馬長史皆有能名大業初刑部尚書宇文弼巡省河北引絢為副煬帝將有事遼東以涿郡為衝要訪可任者聞絢有幹局拜涿郡贊務吏人悅服數載遷為通守兼

領留守及山東盜起絢逐捕之多所克獲時諸郡無復完者惟涿郡獨全後將兵擊竇建德於河間戰死人吏哭之數月不息敬肅字儉德河東蒲坂人少以貞介知名釋褐州主簿開皇初為安陵令有能名擢拜泰州司馬轉幽州長史仁壽中為衛州司馬俱有異績煬帝嗣位遷潁川贊務大業五年朝東都帝令司隸大夫薛道衡為天下郡官之狀稱肅曰心如鐵石老而彌篤時左翊衛大將軍宇文述當塗用事其邑在潁川每有書屬

肅肅未嘗開封輒令使者持去述賓客有放縱者以法
繩之無所寬貸由是述銜之八年朝於涿郡帝以其年
老有能名將擢為太守者數矣輒為述所毀不行大業
末乞骸骨優詔許之去官之日家無餘財歲餘終於家
劉曠不知何許人也性謹厚每以誠恕應物開皇初為
平鄉令單騎之官人有諍訟者輒丁寧曉以義理不加
繩劾各自引咎而去所得俸祿賑施窮乏百姓感其德
化更相篤勵曰有君如此何得為非在職七年風教大

洽獄中無繫囚諍訟絕息囹圄皆生草庭可張羅及去
官吏民無少長號泣緣路將送數百里不絕遷為臨潁
令清名善政為天下第一尚書左僕射高潁言狀上召
之及引見勞之曰天下縣令固多矣卿能獨異於衆良
足美也顧謂侍臣曰若不殊獎何以勸人於是下優詔
擢拜莒州刺史

王伽河間章武人也開皇末為齊州參軍初無足稱後
被州使送流囚季參等七十餘人詣京師時制流人並

枷鎖縛送次滎陽伽憫其辛苦悉呼而謂之曰卿輩既
犯國刑虧損名教身嬰縲紲此其職也今復重勞援卒
豈獨不愧於心哉參等辭謝伽曰汝等雖犯憲法枷鎖
亦大苦辛吾欲與汝等脫去行至京師總集能不違期
不皆拜謝曰必不敢違伽於是悉脫枷停援卒與期曰
某日當至京師如致前却吾當為汝受死舍之而去流
人感悅依期而至一無離叛上聞而驚異召見與語稱
善久之於是悉召流人并令携負妻子俱入賜宴於殿

庭而赦之乃下詔曰凡在有生含靈稟性咸知好惡並
識是非若臨以至誠明加勸導則俗必從化人皆勸善
往以海內亂離德教廢絕官人無慈愛之風兆庶懷姦
詐之意所以獄訟不息澆薄難理朕受命上天安養萬
姓思導聖法以德化人朝夕孜孜意本如此而伽深識
朕意誠心宣導參等感悟自赴憲司明率土之人非為
難教良是官人不加曉示致令陷罪無由自新若使官
盡王伽之儔人皆季參之輩刑厝不用其何遠哉於是

擢伽為雍令政有能名

魏德深本鉅鹿人也祖沖仕周為刑部大夫建州刺史因家弘農父毗鬱林令德深初為高祖挽郎後歷馮翊郡書佐武陽郡司戶書佐以能遷貴鄉長為政清靜不嚴而肅會興遼東之役徵稅百端使人往來責成郡縣於時王綱弛紊吏多贓賄所在徵斂人不堪命惟德深一縣有無相通不竭其力所求皆給而百姓不擾又盜賊羣起武陽諸城多被淪陷惟貴鄉獨全郡丞元寶藏

受詔逐捕盜賊每戰不利則器械必盡輒徵發於人動以軍法從事如此者數矣其隣城營造皆聚於聽事吏人遞相督責晝夜誼罵猶不能濟德深各問其所欲任隨便修營官府寂然恒若無事惟約束長吏所修不須過勝餘縣使百姓勞苦然在下各自竭心恒為諸縣之最尋轉館陶長貴鄉吏民聞之相與言及其事皆歎歎流涕語不成聲及將赴任傾城送之號泣之聲道路不絕既至館陶闔境老幼皆如見其父母有猾人員外郎

趙君實與郡丞元寶藏深相交結前後令長未有不受其指麾者自德深至縣君實屏處於室未嘗輒敢出門逃竄之徒歸來如市貴鄉父老冒涉艱險詣闕請留德深有詔許之館陶父老復詣郡相訟以貴鄉文書為詐郡不能決會持節使者韋霽杜整等至兩縣詣使訟之乃斷從貴鄉貴鄉吏民歌呼滿道互相稱慶館陶衆庶合境悲泣曰從而居住者數百家寶藏深害其能會越王侗徵兵於郡寶藏遂令德深率兵千人赴東都俄而

寶藏以武陽歸李密德深所領皆武陽人也以本土從賊念其親戚輒出都門東向慟哭而反人或謂之曰李密兵馬近在金墉去此二十餘里汝必欲歸誰能相禁何為自苦如此其人皆垂泣曰我與魏明府同來不忍棄去豈道路艱難乎其得人心如此後與賊戰沒於陣貴鄉館陶人庶至今懷之

通志卷一百七十